

Gieus olimpics 2026 – bun per il Grischun?

■ (rtr) Las partidas politicas da l'Engiadin'Ota han organisà l'emprim «Tavulin», ina plattafurma che ha en mira da discutir temas politics ensemen cun la populaziun. Il focus da questa premiera – ils avantatgs e dischavantatgs dals gieus olimpics 2026. Radund 150 persunas èn stadas preschentadas al podì davart il tema «gieus olimpics 2026».

L'onn 2013 ha la populaziun dal chantun Grischun refusà ina candidatura per ils gieus olimpics 2022, quai cun 47,3% gea encunter 52,7% na. Trais onns pli tard è il tema danovamain sin maisa. Questa giada duain ils gieus esser pli durabels e decentrals.

Oravant tut il proceder da laschar votar duas giadas la populaziun ha dà da discurre. Per ils adversaris èn avant maun anc memia poucas infurmaziuns detagliadas per ir avant il pievel.

Ils aderents en persvas che la populaziun duai l'emprim votar sur d'in credit per il project preliminar che prevesa da rimnar las infurmaziuns detagliadas. En



ina segunda votaziun duai alura il pievel decider sur dal project sez.

Il cussegl grond tracta il credit da 25 milliuns francs per realisar il project preliminar en la sessiun dals 5 fin ils 7 da december 2016. La votaziun dal pievel è lura ils 12 da favrer 2017.

Ils quatter participants al podim, da sanestra: Philipp Wilhelm, Ariane Ehrat, Gian Gilli e Jon Domenic Parolini.

FOTO RTR, G. LUZZI